

MISYE EDWA

Istwa kout

Misyé Edwa lévé gran bonnè maten kon touléjou. I bwè on bon kafé byen fò, madanm a-y paré ba-y.
Apré i bwè on bòl soup chofé adan rèstan a yè swa avè on mòso pen rasi.
I anfòm, i senkédmaten, i ka pati an jaden.
Sab a-y an men a-y, sak a-y si do a-y avè déotwa plan a zianm-sanliv adan.
I ka pati a pyé i pa ni vwati. I ka pati bonnè, doukou-la bon sé senk joulalin.
I kay planté manjé.
Rivé an bwa-la i kay vwè bèf a-y, yo tout la. I ka woté yo si pikèt. I ka maré yo kolé-présé.
San pèd tan mi konpè ja ka katyé zianm é manlanga. I sizé si on mòso bwa an pòt a kabé a-y.
On so-dlo koté-y i ka lavé sé zianm-la pou woté tout pichon ki anlè yo é i ka fè plan a-y.
Adan on moman, plan ja paré. I ka pwan on vyé pannyé i ni an kabé-la, i ka ranpli-y avè sé plan-la. Pikwa a-y ka atann li anba on pil pay adan jaden-la.
I ka dépann dé gonmbo sèk é on mayis sèk anba twa a kabé-la, mété sa an pòch a-y. I ja ni tibwen grenn a mèlon, konkonm, é pastèk an pòch a-y. I ka manjé dé fig mi.
Pannyé a-y si tèt a-y, i ka désann an jaden-la simé plan asi siyon yonn pa yonn. Adan on moman i ja planté senkant antout (dé siyon).
Annou-vwè ! I ka-y katyé dèt plan an kabè-la. Apré sé planté ankò. I ka swé kon kannari chatengn.
Lé-i fè sa twa fwa, solèy-la ja ho an syèl-la. Magré chapo pay a-y, chalè-la ka brilé tèt a-y. Fo-y pwan on pòz ni otan zianm ankò a planté. Sé ké pou laprémidi.
I kay pwan on kaskout adan sa madanm a-y paré ba-y. I ké pwofité pou voyé bèf a-y bwè é lésé yo manjé tibwen an lizyè-la.
Apwè manjé i ké ay dépayé tibwen kann. É lè soley-la ké bésé i ké woupwan plantasyon-la. Lè i fè tousa, lajouné ja près bout. Fo i fè mannè.
Lwen a lwen i ka fouré déotwa grenn an tè. Doukou-la bon, fo pa pèd tan. I ja ti-bren lè, lè i ka lagé. I ka mèt bèf an pikèt. Lè ou lésé bèf-la dòmi an savann-la i ka krazé-y é pa ni onlo zèb.
La i fini, zouti ki ka rété an jaden ja ranjé. I ka lavé men a-y obò ma-la.
I ka woupran chimen a kaz-a-y.
Lannuit ja tonbé lè i ka rantré. I travay rèd men i kontan sa i fè !!!

Gaston SAMUT, mé 2007